



Senin, 23 September 2024
Ogen: Sakaria 11:1-3



Enggo Bene Kemulianna



Melal simbol si ipake Tuhan nuduhken bangsa-bangsa si megegeh si pernah naluken bangsa Israel, si erbahansa atena mesui. Kayu Asis, simbol kuta Libanon si megegeh. Kayu Eru, kayu jati i Basan, simbol kuta-kuta si kitik i Basan. Kuta-kuta e me musuh-musuh Israel subuk Israel Utara bage pe Israel Selatan. Saja, uga pe gegehna musuh-musuh Israel e, nandangi ikerneppen me erkiteken perbahanenna si jahat nandangi bangsa Israel. Tuhan si erdahin engkerneppen bangsa-bangsa e benaken i Libanon nari e me kuta si megegeh. Api si gurlah nandangi nciluk kuta e kerina, uga gegehna gia kuta e. Adi kuta Libanon si megegeh pe radas ipan api, mungkin nge puluh kuta-kuta si kitik bagi Basan? La lit si tading, kayu si galang dengen megegeh ras kayu si kitik kerina iradasken. Erkiteken kerangen itutung Tuhan, pemimpin-peminpin kuta e nderkuh kerina, sabap enggo bene kemulianna. La ia ngasup erbahan kai pe aminna ia sekalak pemimpin. Lanai ia ergegeh, lanai ia medurma. Rubia-rubia kerangen pe nderkuh, erkiteken batang kayu kerina kerina radas, lanai lit inganna tading, lanai lit panganna i kerangen, kerina rate mesui. Bage me ukumen Tuhan isehken nandangi kalak si ngelawan Tuhan. Uga pe kita gegehna, uga pe kita hebatna, uga pe kita erkuasana, adi situndaklen ras si lawan Tuhan, la lit ertina. Labo kai pe ras labo ise pe si ngasup nandingi kuasa Tuhan e. I bas paksa si tepat rikutken pengaturen Tuhan, isehkenNa nge ukumenNa, labo ise pe si nagsup mpengadisa. Adi enggo Tuhan si nehken ukumen, ise pe labo ngasup pehulisa sekatan Tuhan e jine. Mekuah nge ateNa adi mulihken kita man baNa, dengen nembah IA alu bulat ukur. Tuhan tetap nimai kita reh man baNa.

Medolat kita adi ras Tuhan